

Wöi dh Wastl sein Schutzängl troffm haout

Dh Wastl, a aagfleischta Jungsöll, haout miet Mutta ud Schwesta aom kloina Baouanhuaf bearbat.

Dh Wastl woa a mordstrumm Maonnsbüld, haout gout aasgschaout ud haout zoulaonga kinna wenn.... Oba daoudrüba schpata.

Sua manchs Maoidl haitnan gean gheirat, dhwaal aon Wast, wöinan sei Freind ghoißn ham, dh Sii niat naou heiratn woa. Ea hait miet seine Weiba dhoam genouch Scherarei, woa saa Red, suama af dös Thema kumma is.

Dh Ground, woarum seina "Weiba" öfta gecha ih afgmuckt ham woa dea, waal dh Wastl, a uvabessalicha Würtshaoushocka, aolle Monaet sei oin bis zwäi "aasgwachsne" Raisch miet hoambracht haout. Naou woara echaal fuchsteifülswüld gecha aollas wosn üban Wech gloffm is, ud aas Wörtl Arbat woaran Wastl fua oain-zwäi Taoch a "bäihmisch Doarf."

Wenngleie die zwaa Fraouala bis in dh Naacht ei garbat hobm, wens drum gaonga is n Wastl sei "schieche Taoch" aaszglaichn, sua wolltsdoch mietm Huaf niat rächt vüatarisch gaih.

Ud dh Mutta ihra Schpruch: "Wennma dh Sunntas ins Würtshaous oaschtatt in Kirchm gaiht naou is ko Seng af dh Arbat", n Wastl ba jedara passadn ud unpassadn Glengheit unta d Nosn griebm, is dean schließle sua af dh Närvm gaonga, daaßa echaal granticha gecha seina Leit gwoan is ud ma haoutse sura bißl aasona-gläbt.

A dänkwürdicha Taoch, dea waou^{je} schtark afm Wastl sein weitan Lemswoandl aasgwürkt haout, woa a Sunnta in Oktowa, genaou aas Schutzängl fäst.

Eichäntle gaihts schou aom Maounta zou. Denn wöi dh Wastl aas Würtshaous valaißt, "vulltinkt", vaschtaihtse, is kuarz voa Mitta-naacht. Wenngleie dh "schtille Zächa" fua sein Hoamwech die goanz Foahbaahn braoucht, sua kummta im Schei vade Schtraoußlotän nu oinichamaßn gout vorao. Wöia oba indaran Földwech aaböigt, saa Huafschaott liegt nämle a bißl aoschichte, haouts mietm Hoam-kumma sei Muckn ud ea schtolpat ud floucht, floucht ud schtolpat in oina Tua.

Daou! ungefäha afm halmb Wech schtaißt in Finstan mietm Fouß gecharan Grosbüschl, valöist aas letzte Bröckl aon Glaichgwücht ud flöigt, mietaran Flouch af dh Zunga, afaran Gränzschttao zou, dea Waou aom Wechroand schtaiht.

Dös is aas Letzte wos "unna Schpathoamkeahra" nu mörkt, naou liegta a schou wöi higmaht aom Roai.

Wea kao seah oda aohna daaß afm Gränzschtäo oina sizt, dea waoun hischturzntn Wastl diräkt im Schaouß affängt?

"Af wean waortstn du?" tout dh Wastl valeng a Fraouch. "Ich hob daou af dii gwaort, sinst haista bam Foalln aas Gnick brochn", kröigta za haian.

Dh Wastl raißt dhschräckt d Aoung af: "Aas Gnick bro..." Ea laongtse aon dös Körpataol, schaout dean Fräama o ud moit: "Ich kännte niat, wea bistn naouchat?"

"Dha Schutzängl!" kummts rouhe zruck.

"Maa Sch,- Schutz,- Schutzängl!" Öizat kao dh Wastl wida lachn:

"Hahaha, a sura Schpaaßvuagl!" Ud glei fraougta luste:

"Waou haoustn dei Flüchl?"

Dh Onna schaoutn gaonz aingaorte o ud saogt: "Schou laong bätzt nimma za dein Schutzängl um Hülff, döswäng konne a nimma flüchlschnäll za dia kumma. Heit haouts graod nuamaol glaongt."

"Dös mietm Betn schtimmt", lacht dh Wastl: "Du bist a Schlaouchal."

Dh Wastl schticht munta weita: "Oba dha Gwaondung, wöi schaoutn döi aas? Hatts änks im Himml nix bessas zaan ozöing?"

Daou schaoutn dh Onna ärnst o ud saogt: "Maa zrißns ud dräckats Klaad bhzaigt dein Lembswaondl."

Daou siaht dh Wastl sein aogeblinga Schutzängl miet zamzwicktn Aouchan o ud schrait: "Sua däfma fei koina kumma!" dhba schlögta miet dh Faoust zou, tout aon Schroa ud wiad munta.

Saa Faoust haout gnaou döi scharfa Gränzschtäokantn troffm ud van afgschlonga Knöchlan tropfts Blout.

Dh Wastl schaoutse bhnumma im. Obschous laongsam häll wiad is weit ud braat nix ud nemaed za seah.

Aas schültn a bißl o.

Schnäll rafftase af, schaoutse nuamaol aon Gränzschtäo o ud gaiht aasgnöchtat hoamzou.

Dhba dänkt dh Wastl ogschträngt üwbas längst vagässn Schutzänglgebel aas seinä Kinnazait naou.